

REGIONAL NEWS

HOME MINISTER : REFUGEE

Home Minister Pu K Sapdanga'n tun dinhmunah Mizoramah raltlan sing 4, sang 1, 355vel an awm mek a, raltlante Biometric data la turin Ministry of Home Affairs, MHA nena indawr mek a nih thu a sawi.

Home Minister Pu K. Sapdanga'n Mizorama raltlan awm chhinchhiahna tur portal chu Ministry of Home Affairs ala inpeih loh avangin chhinchhiahna bultan ala nilo tih a sawi.

He thu hi vawiina Assembly thutkhawma zawhna leh chhanna hunah sawiin Pu K. Sapdanga chuan Sawrkar laipuiin biometric tihna tur atana portal an pek chu state sawrkarin thlak danglam turin rawtna a thlen a ti a, an rawtna chu tun dinhmunah chhan ala nihloh avangin chhinchhiahna bultan ala ni lo a ti a, state sawrkar chuan tan hmun a nei tih sawiin sawrkar laipuia Ministry of Home Affairs nen indawr mek ani tih a sawi bawk.

Home Minister chuan Mizorama raltlan awm zat an chhiar hnahnun berah Myanmar atanga raltlan sing 3, sang 3505, Manipur atangin sang 2633, leh Bangladesh atangin sang 2217, an vaiin raltlan sing 4, sang 1355 vel Mizoramah an awm mek a ti a, a awm zat tak sawi dik thlap a har tih sawiin ramri chu ven ni mah se hmun thenkhatah awlsam taka luh theihna a awm avangin raltlan zat chu a danglam thei nasa hle a ti a, Mizoramah raltlan te leh sumdawng te nen lut an inpawlh avangin an zat chiah hriat a harsat thu a sawi.

Minister chuan sorkar laipui atangin raltlante tanpuina tur a ruokin an dawng a ti a, tanpuina chu district tina DC te kaltlangin hman thin a nih thu sawiin sorkar laipuiin raltlante tana buhfai a pek te chu a dawng tur ten an dawng kim tawha a hriat thu House a hrilh bawk.

Pu K. Sapdanga chuan sorkar laipui puihna bakah hian Mizoram sorkar chuan ama pualin raltlan te chhawmdawlina tur chu district tina DC te leh SP te kaltlangin a pek thin thu a sawi a, Raltlan zingah in leh lo chana khawngaihthlak tak tak an awm rualin, harsatna siam tam tak an awm chu Mizoram sorkar chuan a hria tih sawiin fimkhur takin enkawl dan tur a ngaihtuah mek a ti a, high level committee on indigenous displaced people din niin vawi 2 an thukhawm tawh a, hemi hnuaiah hian district hrang hranga raltlante harsatna zirchiangtu tur committee peng siam a ni tih a sawi bawk.

<><><>

HOME MINISTER : PRISON

Home Minister Pu K Sapdanga'n Mizoram district hrang hranga jail te chu a tawt hle tih sawiin mi tang awm thei zat tura ruahman let deuhthaw deuh vek an tan mek thu House a hrilh.

He thu hi vawiina Assembly rorel inkhawma zawhna leh chhanna hunah sawiin, Home Minister chuan Mizoram district hrang hranga jail te chu a tawt thu leh mi tang awm thei zat tura ruahman let deuhthaw deuh vek an tang mek tih sawiin, a sakna tur lama sum harsatna leh a tang tur lam pung chak lutuk avanga harsatna an tawh mek chingfel turin Mizoram sorkar chuan remchang a hmu dawn ni-a a lan thu House a hrilh a, Armed

Veng-a Aizawl District jail chu Central Jail thlanga ram zau takah sawn tum a nih thu sawiin an hmalakna a hlawhtling thei a nih chuan tuna Central Jail a awm mek chu a thawl phah dawn niin a sawi.

Home Minister chuan zawh belhna chhangin, SASCI Part 1 hnuaia jail hrang hrang thuam thatna tur cheng vbc 55 an dawn chu district jail 8-ah sem darh a ni a ti a, jail hrang hrang te chu a hmuna tlawhtu siamin Central Jail-in mamawh tul a neih phuhru turin Mizoram sorkar chuan hma a la mek a ti a, dan bawhchhia thiam loh chantir tawh, an tihsual siam tawh, rin ngam te awmna tur, Open Jail chu Mizoramah tih ve theih a ni em tih zirchiang turin mithiam ruat mek an nih thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

<><><>

FIRE

Aizawl Mayor Pu Lalrinenga Sailo chuan Aizawl Treasury Bazar chu mipui him zawk nan leh Mizoram hmun pawimawh Assembly House awmna bul hnai anih avangin hmun him zawka sawn ani dawn tih a sawi.

Vawiina Aizawl Treasury Bazar kang a tlawhna ah he thu hi sawiin Pu Lalrinenga Sailo chuan Aizawl Treasury Bazar ah chuan chhiatna hrang hrang alo thleng tawh thin a ti a, a bula chengte tan tun dinhmunah a him tawkhloh avangin helaia bazar insawinna tur Tuikual venga AMC Complex ah ruahman ani ati a, Aizawl Treasury bazar chu a him zawk nan tun dinhmunah mipui tana tlawh pawh theihloh turin ruahmanna an siam tih a sawi.

Aizawl Police OC Pu Lalnunmawia chuan kangmei chhuak chu nizan dar 3 vela thleng a ni a ti a, Forensic hovin evidence an lak atangin a kan chhan an hriat theih a beisei tih sawiin hmalak mek ani tih sawi.

Hetihlai hian Aizawl Treasury Bazar Association President Pu HL Chhingpuia chuan AMC in an awmna hmun sawn an tumna ah ei hmuh zawh an inring lo a ti a, an thuthmun Treasury ami chu sawn lo turin sawrkar an ngen dawn tih sawiin an eizawinna inngahna ber anih avangin sawrkarin ngaihsak se an duh thu an sawi bawk.

Aizawl Treasury Bazar kangah hian thil a kang chhe nual a, building chung bera PAMRA Office, Asam type bungrua leh thil pawimawh kangin a bula I&PR Office darthlalang pawh a keh nasa hle a ni.

<><><>

ART & CULTURE MINISTER

Art and Culture Minister Pu C. Lalsawivunga'n Mizoram Sorkar hnuaiah hian Mizoram State Museum, Mc Donald Hill, Zarkawt ami leh Lunglei District Museum, Sazaikawn ah a awm mek thu House a hrilh.

He thu hi vawiina Assembly thutkhawma zawhna leh chhanna hunah sawiin Mizoram State Museum building thar tur chu MINECO-ah luah theih mai turin buatsaih mek a ni a ti a. Peih fel a nih hunah chuan Mc Donald Hill, Zarkawt-a mi hi sawn pheih tura buatsaih leh buaipui mek a ni tih a sawi.

**Pu C. Lalsawivunga chuan District Museum, Sazaikawn, Lunglei chu sak
thar a ni mahse thawktu erawh an indaih lo hle a ti a, Mizo pi pute thlang
tlak dan chhuina kawngah Art & Culture Department chuan kawng hrang
hrangah hma a la tih a sawi bawk.**

<><><>